

L'ANIVERSARI DAL DELIT

di PIER CARLO BEGOTTI

A son 666 agns di cuant che ai 6 di Jugn dal 1350 il beât Bertrant al foassinât intes planis de Richinvelde; daûr di une tradizion lungje e antighe, al vignarà memoreât cun messis e cerimonis intal puest, ma di cualchi timp ancje inte sô patrie, la ocitane Montcuc (*Montcuq* par francês), stant che intal 2008 e je nassude di chês bandis une fradaie, *Les amis de Bertrand de Saint-Génès* e il Comun al è zimulât cun chel di Sant Zorç (de Richinvelde). Al è stât om di glesie, om de politiche, om des vueris, om che al cirve la pàs, om dal dirit, om de diplomazie: o vin di jessi grâts al professôr Giordano Brunettin par vè editât, tal 2004 pal cont dal Centri Internazionâl di Studi sore la Alte Ete di Mieç di Spoleto, un libri di ricercjis scrupolosis e criticis sul beât Bertrant patriarcje di Aquilee (agns 1334-1350). Une vore di studis a son burîts fûr prime e dopo ancje intes rivistis de Filologjiche (par esempli chei di Andrea Tilatti e Erica Martin intal "Ce fastu?"), ma la vore di Brunettin e reste fondamentâl e magari o podin sperâ suntuone continuazion. Ma cui jerial pardabon Bertrant? Dai nobii di Sant Génès (francês *Saint-Génès*) al nassè intal cjastiel di Montcuc inte region dal Carcin (*Quercy*): la leiende agiografiche e dis tal 1258-1260, ma al samee che la datazion juste e sedi no prime dal 1280, come che al calcolà Pier Silverio Leicht. Il prin at che lu menzone al è dal 1311 e di chês volte al è simpri nomenât tant che professôr universitari di dirit canonic e civil: e par podè mantignî la sô vite di studiôs al metè dongje une bieles filze di beneficis ecclesiastics. Leât al pape, che al jere ancje lui ocitan, si stabilì a Avignon, là che si veve trasferide la cort pontificie e al diventà predi. Propit par chestis relazions, par jessi ben considerât e pai siei meritis, ai 4 di Lui dal 1334 al diventà patriarcje di Aquilee. Stant che la situazion in Friûl e in chês altris tieris dal patriarcjât e jere un grum ingherdeade, il pape i tribù podês speciâi e ancje une dotazion finanziarie straordenarie. La Glesie di Aquilee e jere plene di debits, disseparade di dentri,



Una taule che e rapresente il Patriarcje Bertrant intant che al jude i puars cul daûr il pan

Il beât Bertrant, om di glesie di dirit, di vuere e di pàs

Professôr universitari, leât al Pape, ancje lui ocitan, si stabilì a Avignon
Ai 4 di Lui dal 1334 al diventà patriarcje de diocesi plui grande in Europe

**UN GUVIER
DI 16 AGNS**

Al poia simpri di plui Udin e i Savorgnans che le paronavin, cussì la citât si trasmutà inte capitâl de Patrie, gjavant la funzion a Cividât

menaçade di potencis di fûr: ducj berdeis e dificultâts, ma tal stes timp l'ufici dal patriarcjât al jere prestigjôs e impuartant par un om ambiziôs e vivarôs.

Bertrant al guviernà il patriarcjât par sedis agns e o podin rimarcâ - dentri di un disen e di un impegn unitaris - cuatri aspjets: la politiche internazio-

nâl, la politiche interne, la politiche ecclesiastiche diocesane, la politiche ecclesiastiche provinciâl. Pai prins doi cantins, Bertrant al doprâ doi imprescj: di une bande la vuere, di chês altre la diplomazie. Conts di Gurize, duchi di Austrie, Caminês, republiche di Vignesie a forin i avversaris, intun cun fameis cjastelans, comunitâts, sociis di feudataris. Bertrant al scugnì ancje mantignî un ecuilibrî jenfri i interès dal pape e chei dal imperadôr, jenfri *vuelfs* e *ghibellins*, stant che no simpri lis sieltis de Glesie universâl a jerin chês de Glesie aquileies. Denti dal Friûl, il patriarcje al poia simpri di plui Udin e i Savorgnans che le paronavin, cussì la citât si trasmutà inte capitâl de Patrie, gjavant cheste funzion a Cividât. Ma nol bandonà Civi-

**LA CONZURE
TAL 1350**

Al pritindeve rispiet e sotanance ma chest lu condanà: i cjastelans che lu spietavin ae Richinvelde lu coparin

dât, cirint di svilupândi la vocazion universitarie, regalant libris al *Studium* che al jere stât viert dal patriarcje Otobon. Però no vin di dismenteâ che Bertrant al jere vescul de sô diocesi, la plui grande de Europe: a travers di riformis, statûts, sinodis al jentrà inte vite religjose di predis, fraris, muiniis, fedèi par puartâ ordin, par dissi-

plinâ lis struturis, par stiçâ la devozion e la caritàt. Intes pituris fatis daspò de muart, lu viodin amî dai puars. Al jere no dome vescul, ma ancje patriarcje, vâl a di vescul parsore di altris vescui, a cjâf di une provincie che e partive de Lombardie e e rivave in Slovenie, de Istrie al Venit e ae Austrie: Bertrant al à pretindût rispiet e sotanance de bande dai oms de glesie che a partignivin ae sô metropoli. Dut chest sfuarç, che al staronzave podês e interès, lu condanà: une schirie di cjastelans furlans e conzura cuintri di lui, lu spietarin ae Richinvelde e lu coparin. E ancje se altris patriarcjis a ciririn di puartâ ordin inte Patrie, il destin dal patriarcjât politic di Aquilee al jere aromai segnât.

GRIPRODUZIONE RISERVATA

TRADIZIONS IN CJARGNE

Il standart di Davai peç che i coscrits a plantin te place par Sant Antoni

di Celestino Vezzi

Davai, frasion di Lauc, al vif tai dis davant da fieste di Sant Antoni un biel moment peât a plui gjenue tradizion da gioventût: il standart. Si trate di un grant peç che i coscrits e i giovin dal pais ai plante ta place lant daûr a un cerimonîal che ju viout impegnâs das primas oras dal dopomiesdi fintramai a penge not.

Tal prin dopomiesdi si cjatin in Placioleta cun dut ce ch'a covente par là a proviedi la plante plui juste "par fâ il bant" tal bosc comunâl; la sielte a domande atension, il peç al à da jessi biel dret fintramai insomence difiets di sorte. Tajât e dispedit par ben das brenas, peças e scuarce, cun sapins e stros, al ven tirât in strade pront pal viaç che lu puartarà in pais. Tornant ai proviout il cimâl: une ponte di peç bieles e ben furnide; viers las sis di sere peç e cimâl ai rivin in place davant da gleisje dal Spirtu Sant. Par po-dei maridâ peç e cimâl al ven fat un lavôr di fin sot il vouli dai vecjos che ai san dâ i conseis dal cās.

Intant la place a cjape vite e al è dut un vie vai di int tant che il lavôr al va indavant; tocje di parecjà l'invit, la giõe tal standart par fâlu entrâ tal tombin dulà che al sarâ fissât, ben salt.

Si parecjin las pivas: trei cubias di piertias di divierse lungjece leadas a stents dôs a dôs cun cuardas. Las giovinas an il compit di visti il cimâl e lu fasjin cun ce che an giâ parecjàt par timp: rôsas e golainas di cjarte ingrispade di diviers colôrs.

A trei cuarts dal standart a ven fissade la bandiere da classe ch'a sventularà libere as bugadas dal arie.

Simpri a une certe altece dal peç vegnin fissadas trei lungias cuardas che tiradas e tindudas da int in diviersas direcions as judarân a tegni a dret il standart tal moment di arcâlû sù inpiis.

Par jovâlû inpiis al è dut un cerimonîal particolâr ch'al viout un sfuarç unic di tante int ognun cun compits diviers che cun grande atension ai scoltin i ordins di une persone che al direç i diviers moments: al dâ la joca.

Las pivas as strengin tas lôrs cuardas il standart tant che une smuarce e fasint jeve su las piertias plan planin lu âlcin; moments di fadie alternâts a moments di pouse simpri lant daûr a un alc che nol è scrit, ma che al è ben vif e presint ta memorie di chei che an supât il savei vivint par agns chescj moments dongje dai vecjos che tal timp an tignude in vite cheste usance.

Las cuardas si tindin simpri di plui e plan planin il standart al drece il so cimâl viers il cil; l'ultime fadie a si libere intune bieles batude di mans.

Un giovin al si rampine sù cun grinte fintramai a disgrupâ las cuardas ch'an judât a tegni a dret il standart e subit dopo las cjampanas si dismòlin intun saurât companon che si spant in dute la valade.

(varietât di Çurçuvint)

GRIPRODUZIONE RISERVATA

ART DAL NÛFCENT

Une fieste populâr di Sergio Altieri



■ Sergio Altieri, "Festa popolare in Friuli" (particolare), 1955. Il pitôr, nassût a Caprive tal 1930, al è un dai plui impuartants dal moviment neorealist e dal Nûfcen. O vin sielt un particolâr di cheste sagra di pais, cun "Gigi Oca", che al vendeve gjelatos. (g.e.)

NONS DI LÛC

Dueibis, bosc e tiere scure dai Celts

Altris doi nons compagns a San Florean di Buie e a Fusee

di Ermanno Dentesano

Dueibis e je une piçule borgade di Verzegnis - ma li le clamin *Dueibas* e si cjatile scrite ancje *Duebis* e *Doibis* - là che in di di vuê nol sta plui nissun, par vie che e je masse lontane dal centri. Za fa cualchi an a an metût a puest cualchi cjase par stâ vie pal istât, che al è tant di mode vè une cjase a la contadine (par fente).

Dut cās nus à vignude la pice di capî di indulà che al diven chest non. Cussì o vin provât a scandiâ i nons di cheste fate che si cjatin vie pal Friûl.

O viodin cussì che a son chei di divignince slave, sicu

Dobbia (Starançan) e cetancj *Dob'a/Sobje* spamiçats sù pes valadis de Tor, che a la lôr fonde a an *dob* (rôl). Nol è il nestri cās, par vie di fastidis linguistics un fregul ingredeâts. E problemis di cheste fate nus puartin a lassâ fûr ancje il supuest - butât là di un studiôs - che a divegnin dal latin *duas vias*, par vie di une beorcje; o ben di *dubius* intal sens di difilicil, pericolôs.

Il nestri non nol pues jessi svinçinât a *Duviês* di Fors disore, non che no rivin a spleâ. E no si pues pensâ nancje al latin *duplus* (dopli), che invect di chest al diven Valdobbia, in Piemont. A Preon o cjatin, par

di il vèr, un *Duobes*, che il Somarion al ripuarte tant che *Dubles*; ma al è alc che nol torne e in altrò o disarîn parcè.

Doi nons compagns dal nestri - in plui di chel di Preon - a son *Dobis/Dobes* a San Florean di Buie e *Dobis/Dobes* a Fusee. O pensin che la lôr lidris e sedi une viere peraule celtiche *dubus* (neri, scûr) che e vignive doprade par terens a tramontane di une mont, ma so-redut tant che atribût di un bosc.

Nus somee che al vadi propite une piture a cemût che o vin bielzà spleât Verzegnis tant che *Virginee fagete*.

GRIPRODUZIONE RISERVATA